

Awe Maritza Faro-Maduro ta celebrando su 25 aniversario den prensa

ORANJESTAD – Awe nos colega di BON DIA Aruba y un miembro reconocí di e gremio di prensa local, sra. Maritza Faro-Maduro, ta celebrando 25 aña dedica na e noble profesion di periodismo.

Maritza ta un persona cu a nace cu e vocacion di dedica su potencial pa informa nos comunidad. For di teenager e tabatin un inkietud grandi riba tereno periodistico. Un-

abes cu el a culmina su estudio secundario, el a bay Merca pa inicia su estudio profesional riba materia di periodismo. Sinembargo apesar di tur esfuerso y sacrificio familiar e mester bin bek na su tera natal sin logra culmina su carera universitario.

Pero e experiencia aki a curasha Maritza pa sigui lucha den su sueño pa bira un profesional autodidact den periodismo. Ta asina cu Maritza su prome step riba e caminda largo di 5 lustro di labor periodistico tabata cu e corant Extra.

Esaki tabata su universidad y su plataforma cu a yuda Maritza den su formacion profesional, y pa profila su mes como un periodista respeta y di principionan etico



solido.

Maritza ta un di e periodista pionero ora cu BON DIA Aruba a nace 20 aña pasa. El a ocupa pa varios aña e funcion di Hefe di Redaccion di BON DIA Aruba, unda e tabatin e humildad, habilidad y carisma pa dirigi y orienta e team di redaccion di e matutino aki.

Despues di un receso corto caminda el a bay traha den otro matutino,

Maritza a bin bek na su cas periodistico original, esta BON DIA Aruba, unda e ta un persona clave y masha stima pa tur su coleganan.

Maritza ta un obrero di prensa, semper dedica y dispuesto pa sacrifica te hasta su famia pa un bon noticia. E ta un ehempel bibo di e frase cu ta bisa: "E periodista ta nace y no ta wordo haci". Dios duna Maritza hopi bida y sabiduria pa sigui eherce cu e mesun amor y dedicacion di semper "e profesion mas bunita di henter mundo, esta periodismo", manera e escrito Frances, Albert Camus a yega di bisa. Hopi pabien, Maritza pa bo 25 aniversario den prensa. □